

Uunga siunnersuut: Sumiiffinni immikkut toqqakkani takornariartunut kiffartuussinernik ingerlatsinissamut akuersissuteqartarneq pillugu Inatsisartut inatsisissaattut siunnersuut

(Inuutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Akissuteqaat

(Inuutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Pingajussaanneerpeqarnera

Naalakkersuisut Inuussutissarsiornermut Aatsitassanullu Ataatsimiititaliaq isumaliutissiissuteqarneranut aammalu inatsisissamut siunnersuummik sukumiisumik suliarinninneranut qutsavigaat.

2/3-imik najukkameersut piginnittuunissaannik piunasaqaateqarnissaq kissaatigalugu Inuussutissarsiornermut Aatsitassanullu ataatsimiititaliaq isumaliutissiissummini saqqummiussivoq. Naalakkersuisut tamanna tunngavigalugu kissaateqarnermik taassuminnga naammassinnittumik allannguutissatut siunnersuummik suliaqarput.

Najukkani inassisimasut piginnittuunissaat pillugu piunasaqaat inatsimmi tunngaviusumi § 73 naapertorlugu suliffeqarfiit piginnittussaataitaneranni taarsiissutitalimmik arsaarinninnerusinnaasoq, siusinnerusukkut tusarniaanermut akissuteqaammi saqqummiunneqarpoq.

Naalakkersuisut soorunami inatsimmi tunngaviusumi aalajangersakkat ataqqivaat, aammalu ingerlatseqatigiiffiit taarsiissutitalimmik arsaarinninnerusoq uppersarsinnaappassuk, tamanna Naalakkersuisut isummerfigissavaat. Naalakkersuisut naliliippat taarsiissutitalimmik arsaarinninnissap aarlerinaateqarnera takorluugaanerusoq aammalu nalinginnaasumik inatsisip sunniutigisussaangikkaa. Inatsisip siunertaanngitsumik naapertuutinnngitsumillu sunniuteqarnerinik iliuseqarfiginniffiusinnaasumik, inatsimmi immikkut ittumik akuersissuteqarnissamut aamma aalajangersagaqarnera Naalakkersuisut innersuussutigaat.

Inatsisissamut siunnersuummi suliarineqartumi inatsisip unioqquatinneqarnerani imaluunniit mianersuaalliorujussuarnermi pineqaatissiisoqarsinnaavoq. Aamma annikitsumik mianersuaalliornermi pineqaatissiisinaanissaq siunertaralugu, Ataatsimiititaliami amerlanerussuteqartut allannguutissatut siunnersuummik saqqummiussippat. Naalakkersuisut siunnersuut taanna taperserpaat.

§ 10-mi, ingerlatsinissamut akuersissutitut neqeroortitsinerni toqqaanissamut tunngavissarititaasunut tunngassutilimmi aammalu § 16-imi, Naalakkersuisut najukkaneersunik sulisoqarnissaq najukkaneersunillu pilersuisoqarnissaq pillugu piumasaqaateqarnissamut periarfissaqarnerannut tunngassuteqartumi, sukannernerulersitsisoqarnissaa, ataatsimiititaliami amerlanerussuteqartut aammattaaq Naalakkersuisunut kaammattuutigaat. Najukkaneersut suliffeqarfiit aammalu najukkaneersut sulisussat salliutinneqarnissaannik qulakkeerinissaq, ataatsimiititaliap kissaatigaa.

Naalakkersuisut tamanna tunngavigalugu § 10-p oqaasertai iluarsivaat. § 16-imut tunngatillugu kingusinnerusukkut nalunaarummik suliaqarnikkut Naalakkersuisut ataatsimiititaliap kaammattuutaa malinniarpaat.

Najukkaneersut suliffeqarfiit ingerlatsinissamut akuersissutitut neqeroortitsinermi salliutinneqartarnissaat, aamma ataatsimiititaliap Naalakkersuisunut kaammattuutigaa. Tamanna 2/3-inik najukkaneersut piginnittuunissaat pillugu piumasaqaatip allanngortinneqarneraneereerpoq. Tamanna aamma allamut tunniussinissaq qinnuteqaatigineqartillugu pisoqarnerani atuutissaaq. Taamatut pisoqarnerani ingerlatseqatigiiffiup akuersissummik tigusaqartup, aamma 2/3-inik najukkaneersut piginnittuunissaat pillugu piumasaqaat malittussaavaa. Taamaalilluni ingerlatseqatigiiffiit nunanit allaneersut ingerlatsinissamut akuersissummik pissarsinissamut periarfissaqanngillat.

Kiisalu ingerlatseqatigiiffik nunanit allaneersut ingerlatsinissamut akuersissummik pissarsissapat, piffissap akuerissuteqarfiusut ukiunut 5-10-nut sivikillisinnissaanik ataatsimiititaliami amerlanerussuteqartut Naalakkersuisut kaammattorpaat. 2/3-inik najukkameersut piginnittuunissaat pillugu piumasaqaateqarnermi ingerlatseqatigiiffiit nunanit allaneersut akuersissummik tunineqarsinnaasussaannngillat. Tamanna tunngavigalugu Naalakkersuisut inassutigaat ingerlatseqatigiiffinnut nunanit allaneersunut ukiunik 5-10-nik sivikillisitsinissaq inatsimmi allanneqassanngitsoq, tassami tamanna paatsuungatitsiinnalersinnaammat imaluunniit ingerlatseqatigiiffiit nunanit allaneersut akuersissummik pissarsisinnaanerat nalornissutaalersinnaammat.

Takornariartitsinermik inuussutissarsiornermi najukkani inissimatitsinerup nukittorsarneqarnera pillugu kiisalu inatsisiliornissamik naleqquttunik suliniuteqarnikkut, ilanngullugit akileraartarnermut inatsisini maleruagassat aamma transfer pricing pillugu aalajangersakkat, najukkani suliaqartuusut illersorneqarnissaannik pilersitsiviulluarmik inassuteqaataannut ataatsimiititaliaq Naalakkersuisut qutsavigaat.

Taamatut oqaaseqarlutik Naalakkersuisut namminneq allannguutissatut siunnersuutimik kiisalu ataatsimiititaliap allannguutissatut siunnersuutaata akuerineqarnissaat inassutigaat.